

HARI MINGGU PRAPASKA KE-5 (A)

Yehezkiel 37:12-14; Mazmur 129. R/ ayat. 7; Roma 8:8-11
Yohanes 11:1-45 (Versi Singkat, Yohanes 11:3-7. 17. 20-27. 33-45.)

Tema: **PERCAYAKAH KAMU BAHAWA YESUS ADALAH KEBANGKITAN DAN KEHIDUPAN?**

1. Hari ini adalah Hari Minggu Prapaska ke-5, dalam Tahun Liturgi A. Kita menggunakan Tahun Liturgi A, sebab pada Malam Menjelang Paska ada pembaptisan para katekumen!

Injil hari ini memberitahu kita bahawa Yesus adalah kebangkitan dan hidup; barangsiapa percaya kepada-Nya, ia akan hidup walaupun ia sudah mati dan setiap orang yang hidup dan yang percaya kepada-Nya, ia tidak akan mati selama-lamanya!

Itulah sebabnya, Yesus adalah kebangkitan dan hidup, barang siapa percaya kepada-Nya walaupun sudah mati dalam dosa dia akan hidup dan barangsiapa yang hidup dan percaya kepada-Nya tidak akan mati dalam dosanya, iaitu, dia tidak akan berdosa dan mati!

Soalannya adalah:

“Percayakah engkau akan hal ini?” (Yoh 11:26; SM)

Inilah soalan yang ditanya dalam Injil kepada kita hari ini! Inilah soalan yang Yesus tanya kepada Marta! Dan Marta menjawabnya:

“Ya Tuhan, aku percaya bahawa Tuhan Anak Allah, Penyelamat yang diutus oleh Allah, dan yang dijanjikan untuk datang ke dunia ini.” (Yoh 11:27; SM)

Dan disebabkan oleh iman dan kepercayaan Marta, Yesus membangunkan saudaranya Lazarus dari kematian:

“Lazarus, keluar!” (Yoh 11:43; SM)

Dan Lazarus yang sudah meninggal keluar! Lazarus telah empat hari mati!

Pada Malam Menjelang Paska kita juga akan di soal tentang iman dan kepercayaan kita! Kita akan ditanya 6 soalan, 3 soalan menyangkal setan dan 3 mewartakan iman kita kepada Allah! Kita menyangkal setan dan segala pekerjaannya dan seluruh janji kosongnya, sebab setan mengoda kita supaya tidak percaya kepada Allah sama seperti ia mengoda Adam dan Yesus jangan percaya kepada Allah.

Yang penting, kita akan ditanya 3 soalan mengenai iman dan kepercayaan:

(i) **“Percayakah saudara-saudara akan Allah Bapa yang mahakuasa, pencipta langit dan bumi?”**

(ii) **“Percayakah saudara-saudara akan Yesus Kristus, Putera-Nya yang tunggal, Tuhan kita, yang dilahirkan oleh Perawan Maria; yang menderita sengsara, wafat dan dimakamkan; yang bangkit dari antara orang mati, dan naik ke surga duduk di sisi kanan Bapa yang mahakuasa?”**

(iii) **“Percayakah saudara-saudara akan Roh Kudus, Gereja Katolik yang kudus, persekutuan para kudus, pengampunan dosa, kebangkitan badan dan kehidupan kekal?” (SM)**

Dan apabila kita menjawab "Ya aku percaya" 6 kali, kita akan dibaptis dalam nama Bapa, dan Putera dan Roh Kudus dan kita akan mati dan bangkit bersama Yesus Kristus ke dalam hidup baru Paska! Bagi mereka yang sudah dibaptis mereka juga akan direnjis dengan air pembaptisan dan kita akan mati dan bangkit bersama Yesus Kristus ke dalam hidup baru Paska!

2. Bacaan pertama memberitahu kita bahawa Tuhan akan membangkitkan kita dari kematian melalui kuasa Roh Kudus!

Kebangkitan Lazarus hanya sekadar penyedaran. Ia hanyalah tanda kebangkitan. Ia bukanlah kebangkitan! Lazarus harus mati sekali lagi. Tetapi untuk membangkitkan kita dari kematian Yesus

sendiri harus mati dan bangkit dari kematian dan memberi kita Roh Kudus! Justru itu kita baca dalam kaption/ulasan di bacaan pertama:

“Aku akan mencurahkan Roh-Ku kepadamu dan kamu akan hidup kembali.” (Yeh 37:14; SM)

Bacaan pertama pada asalnya ditujukan kepada pembuangan Yahudi di Babilonika.

3. Bacaan kedua juga memberitahu kita bahawa hanya melalui kuasa Roh Kudus Tuhan akan membangkitkan kita dari kematian!

Bacaan kedua ditujukan kepada yang dibaptis, tetapi hari ini ianya ditujukan kepada yang dibaptis dan terutama kepada para katekumen yang akan dibaptis pada Malam Menjelang Paska! Dengan itu kita baca dalam bacaan kedua:

“Jika Roh Allah yang membangkitkan Kristus daripada kematian, hidup dalam diri kamu, Dia yang membangkitkan Kristus daripada kematian itu, juga akan menghidupkan badan kamu yang fana. Dia melakukannya dengan Roh-Nya yang hidup dalam diri kamu.” (Roma 8:11; SM)

4. Mazmur antarbacaan adalah Mazmur penyesalan. Ia adalah "doa untuk pengampunan dan belas kasihan". (CSB) Mazmur antarbacaan mempunyai empat rangkap. Rangkap pertama dan kedua adalah doa untuk pengampunan. Rangkap ketiga dan keempat adalah kenyataan kepercayaan. (Faley) Dengan itu sahatannya kepada Mazmur antarbacaan yang diambil dari rangkap keempat:

“Pada Tuhanlah kasih setia dan penebusan berlimpah.” (Mzm 129 (130): 7; SM)

5. Pada musim Prapaska ini Gereja meminta kita untuk berdoa, berpuasa dan memberi sedekah kepada yang miskin; bukan sebagai undang-undang atau hukuman, tetapi untuk membantu kita bertobat supaya kita dapat dibaptis atau membaharui pembaptisan kita pada Malam Menjelang Paska dan mati dan bangkit bersama Yesus Kristus ke hidup baru Paska! Sukacita dan berkat Prapaska untuk kamu semua!

Amen!

Cadangan soalan untuk renungan perseorangan dan perkongsian dalam keluarga, dalam kumpulan kecil, dan kumpulan komuniti-komuniti yang kecil:

1. Percayakah kamu bahawa Yesus Kristus adalah Kebangkitan dan Kehidupan?
2. Adakah kamu berdoa, berpuasa dan memberi sedekah kepada yang miskin untuk persediaan pembaptisan kamu atau untuk pembaharuan pembaptisan kamu?
3. Apakah bezanya antara kebangkitan Lazarus dan kebangkitan kamu dalam Yesus Kristus?
4. Mengapa kamu menolak setan? Apakah godaan setan kepada Adam, Yesus dan kamu?
5. Adakah kamu pergi "mengaku" pada musim Prapaska? Adakah kamu menderma darah pada musim Prapaska?

Fr. Nicholas Ong, Holy Trinity Catholic Church (HTCC), Tawau, Sabah, Malaysia,

Rujukan: Catholic Study Bible (CSB); Sunday Missal (SM).